



客(四縣)/文史/☆☆☆☆

食楊梅，樹下企

四月八，楊梅紅煞煞。舊曆四月邊仔，係楊梅大出個時節。看著歸樹仔又紅又圓又大粒個楊梅，想著該又酸、水分又多個味緒，緊個就會緊吞口涎呢！連該白頭公仔都做做挖挖飛兼來，這粒啄、該粒啄。鳥仔比人較精食，專門擇紅個，慁哪！手腳無較遽兜仔，就愛撿佢食伸个了！

楊梅樹愛種有七、八年正會打，打欸又當會落果、鳥仔又凶呷呷仔，實在無恁該食。聽講，楊梅還有一段神祕个故事：老人家輒常講，楊梅開花無人知。愛看著佢開花，比愛食著厥果子還較難喔！原在有一個秀才，佢誇口講：「偌麼个花都看過了，就無看過楊梅花定定。」日想夜想，有一暗晡，佢將就就睡到楊梅樹下，望等看佢久開花。這擺總算畀看著了！毋過，第二日朝晨，人嘎發現著佢搵在樹下，消忒了。

楊梅敢會咒人？其實，楊梅係在過年前後、冷颼颼个天時開花个。愛在外背欣賞厥花，就愛著加兜仔衫，正毋會寒著——該秀才，怕係寒死个啦！楊梅个花妞妞仔、紅紅一點點仔，比麻仔還較幼。愛行兼、詳細看，正看得真。異得人惜呢！

花落忒過後，一粒粒仔青青、圓圓个果子，就暴暴出來，打到一樹仔當結。等到佢略略仔轉紅，就做得摘來食了，越紅會越有甜味。楊梅無麼个有肉，核異大粒，故所人講「食桃飽，食李飢，食楊梅，樹下企」——愛企在樹下緊逐鳥仔、緊摘緊食，正食得罍擺。楊梅酸丟丟仔，貪甜个人，怕食毋慣。毋過，好酸个人，斯愛把握這大出個時節。係無，等到五月節，楊梅撥撥跌，跌淨了，想食就愛等下二年了！

作者：徐汎平

☆詞彙學習☆

- 【邊仔】bien' e'：左右，臨近某個數量。 【妞妞仔】niu niu e' / diu diu e'：小小的。
 【做做挖挖】zo zo ied' ied'：千方百計。 【罍擺】la bai'：夠本、滿足。
 【精食】jin' siid'：懂得享受飲食。 【撥撥跌】bad bad died'：東西不斷掉落的
 【凶呷呷仔】hiung' gab gab e'：食慾旺盛、樣子。
 狼吞虎嚥的樣子。 【下二年】ha ngi ngien'：下一年、明年。

☆文法學習☆

【緊 + V_{動詞}】一直……。 「緊」讀為 gin'，也會弱化讀 in'，後方接動詞，表示動作持續進行。若將這個構詞重疊，變成「緊 V_{動詞1} 緊 V_{動詞2}」，則會延伸出「一邊……一邊……」的意思，表示兩個動作同時進行。

例 1：你仰緊食茶，恁嘴燥喔？（你怎麼一直喝茶，這麼口渴喔？）

例 2：這下毋知愛食麼个正好，慁先緊行緊看正講。（現在不知道要吃什麼才好，我們先邊走邊看再說。）